




Literatura den Bon Dia

Ernesto E. Rosenstand



COMPANASHI ----- *Cronica di recuerdonan scondi*

Naturalmente cu e caya despues di no mucho ora ta bolbe seca y stof ta cuminsa lanta atrobe. Pues atardecito, hopi actividad den e caya. Hopi hende dilanti di cas ta muha e caya.

Muchanan na cantidad ta muha e caya. Y tin biaha nan tabata muha otro tambe. Y ora cu caba cu e ceremonia aki hopi hende tabata bai e plaza. Muchanan na cantidad, pues hopi movimiento. Hopi ambinete.

Y no mucho leu for di unda nos tabata biba tabata core e riu Manzanares. Di e riu aki mi tin hopi recuerdo grato. Banda di e riu aki tabatin hopi naturalesa. Berde tur caminda. Tur sorto di mata. Ei banda nos por a hunga na nos smaak y sin preocupacion. Tabata otro mundo cu esun di stad.

Ta mondi so tabatin y un kietud sin igual. Nada por a stroba nos, nos tabata liber manera barbulet. Nos tabata explora e mondinan ei manera berdadero explorador. Nos tabata soña cu bestianan salbahe cu nos lo mata ora nos topa nan. Esei nos tabata soña!

Ma realidad tabata otro: nos tabatin un miedo di mil demoño. Den nos curason nos tabata desea pa no topa cu ningun. Cu cualkier sonido nos tabata cla pa core.

Colebranan venenoso na cantidad. Y di esakinan nos tabatin hopi miedo mes. Tabatin di nan cu tabata mortal. Un di nan a morde mi padushi mata den cunucu banda di Sierra Nevada.

Dianan cu tabata liber o den fin di siman e tabata sa bai ei. Y un di e biahnan ei un colebra a mord'e. El a descuida... usa remedi di tera, ma nada no a yuda. Dia el a dicidi di baha busca miho ayudo ya tabata laat y el a muri.

Di e dia ei mi tin miedo panico pa e bestianan aki. Y banda di e riu tabatin masha hopi. Tur sorto. Ma no solamente colebra, ma tur sorto di bestia. Di raton di anochi tambe nos tabatin un miedo spantoso. Nan manera di bula tabata masha raro. Y den e partinan scur bo tabata haya masha hopi di nan. Hende grandi tabata conta cosnan masha raro di nan.

Ki ora cu kier a bai busca bestia ta ei banda tabata bai. Ei banda bo tabata sigur cu lo bo haya. Yuwana na cantidad, tabata increibel mira cuanto di e bestianan aki tabatin ei banda. Hende grandi tabata coi nan ora nan tin webo den nan barica, corta esaki y saca e webonan. Tempo di webo di yuwana ta cantidad bo tabata haya ta colga den e tiendanan. Despues nan tabata cose nan y bolbe laga nan bai den mondi. Hopi hende tabata gusta e webonan aki. E yuwana mes nan no tabata come. Ma no solamente yuwana tabatin tambe tur sorto di parha.

Esakinan tabata percura pa duna e ambiente mas bida cu nan cantamento y desorden. Tur sorto di sonido bo tabata tende den e mondi ei. Esei si ei banda tabatin

masha hopi desorden di e diferente parhanan.

Y ei banda tabata biba tambe un señora cu tabata haci cosnan straño. E tabata biba so Loke tambe tabata hopi raro tabata cu e tabata biba asina so den e ambiente ei. E señora aki tabata hopi bieu. Nan tabata kere cu e tabata mes bieu cu e mondi unda e tabata biba aden. E tabata pertenece na dje.

E tabata move den dje cu e facilidad nunca bisto. Bo tabata haya e impresion cu e tabata tin e teritorionan aki den su poder. Tabata parce cu henter e becindario tabata su cas, su teritorio.

E no tabatin miedo di nada ni di ningun bestia. Tabata parce cu esakinan tabata respet'e. Bo tabatin e impresion cu e tabata conoce nan tur y nan tambe tabata conoce. Dor di su manera di biba e tabata comporta su mes otro.

Su manera di biba mes tabata yama atencion di hopi hende. Su so den mondi.

E tabata otro di esunnan cu tabata biba den stad. E no tabata pertenece na e stad. E tabata aleha di tur cos. Con bin esei nos no tabata sa? E tabata biba hopi solitario. Solitario di mas! Te hasta por bisa bandona, sin contacto cu otro hende. Principalmente di esunnan di stad. Esei nos tabata kere.

Banda di su cas no tabatin ningun otro hende ta biba. E so mei mei di e mondi berde cu tabata parce cu tabata cubri tur cos. Aleha di tur cos! Mei mei di naturalesa.

Y hopi hende tabata haci preguntanan:

- Ta di con un hende asina ta biba asina retira?
- Ta cos malo e ta haci cu e ta prefera biba leu for di hende?

Naturalmente cu nan no a haya contesta pakico e shon aki tabata biba ei banda. Nan no a haya sa tampoco ki tempo el a bai biba ei. Riba un bon dia el a aparece ei banda.. Ni tampoco di unda el a bin. Nos mes dor di su manera di haci tabata kere cu e tabata eterno. Cu semper el a biba ei banda y p'esei e tabata pertenece na e naturalesa cu tabata keda banda di su cas.

Tabatin hopi hende si cu tabata desconfia di dje. Y atrobe tabatin cu no tabata hay'e di e malo ei. Loke si mester bisa ta cu su manera di biba tabata hopi straño. E no tabata manera esunnan di stad. E tabata busca manera di hui for di hende. Cu masha poco hende e tabatin contacto. Bon esei nos tabata kere.

Practicamente tur ora bo tabata hay'e so. Tabata parce cu e no tabatin necesidad di compania di otro. Otro cos cu e tabata haci tabata papia cu su mes. Un continuo monologo! Anto si ningun sorto di sentido. Tin biaha ni sa bo tabata sa kico e tabata bisa.